

diadakan oleh orang-orang Islam Singapura, di antara lain mengatakan bahawa orang-orang yang beragama hendaklah sabar dan janganlah mencampurkan siasah dengan agama dengan menggunakan agama menaikkan perasaan siasah.

Perkataan Perdana Menteri Singapura ini, sebenarnya menunjukkan bahawa beliau tak mengerti dan tak mengkaji kedudukan agama Islam dan perdampingannya dengan siasah bernegara. Hal yang demikian ini, kerana beliau bukan seorang Islam dan bukan pula orang yang mendalamai hal-hal Islam dan sejarahnya, bolehlah dimaafkan tetapi sebaliknya sepatutnya beliau sebelum bercakap dihadapan am hendaklah menyelidiki dahulu kerana ditakuti bahawa dengan berkata-kata di dalam suatu perkara yang kita percaya hanya pendapat daripada “mendengar” sahaja akibatnya akan kurang baik kerana harus tujuan yang bersih daripadanya akan dipandang orang dengan perbuatan cuba menahan kebebasan pendapat sesuatu agama.

Tuan Lee Kuan Yew harus tidak mengetahui bahawa agama Islam adalah keadaanya lain daripada agama lain. Ia tidak dapat dipisahkan dengan siasah disebabkan Islam mempunyai empat punca-punca hukumnya:

1. *Ibādah*
2. *Munākahāt* (nikah kahwin)
3. *Mu‘āmalāt* (berjual-beli)
4. *Jināyāt* (hukum-hukum jenayah)

Untuk menegakkan hukum-hukum ini maka diwajibkan bagi tiap-tiap pemeluknya menghukum dengannya dan jika ia tidak menghukum dengannya maka orang-orang itu akan jadi fasik, zalim dan kafir. Kewajipan ini adalah terus-menerus diwajibkan tetapi jika sekiranya mereka tidak dapat melaksanakannya disebabkan mereka tidak ada kekuatan atau mereka terjajah maka kewajipan menyampaikan atau memperjuangkan tujuan itu tidak akan gugur.

Untuk menegakkan hukum-hukum Tuhan yang meliputi di dalam cara bahagian hidup itu dengan sendirinya tidak dapat dilakukan daripada diperjuangkan sedang memperjuangkannya adalah menjadi suatu jihad yang wajib dilaksanakan oleh tiap-tiap pemeluknya kerana agama Islam itu, sebagaimana corak asas hukumnya di atas, tidak akan dapat dipisahkan daripada siasah negara, hanya sanya di dalam tempat-tempat

yang sedikit umatnya, kewajipan pemeluknya ringan sedikit tetapi mereka diwajibkan Tuhan, bukan diwajibkan oleh keadaan untuk menegakkan kalimah Tuhan (ertinya hukum-hukum Tuhan) dengan jalan terlebih dahulu memberi kesedaran. Cara memperjuangkan ini terang ditunjukkan oleh Nabī Muhammad (S.A.W.) sendiri.

Dengan ini ertinya maka timbulah kewajipan bagi tiap-tiap umat Islam untuk menegakkan negara Islam atau *Dār al-Islām* yang dalamnya telah terbentuk pula hukum-hukum di atas orang-orang yang bukan Islam yang duduk di dalam negara Islam. Kalau orang-orang mempelajari sejarah Nabī sehingga kepada sejarah Khulafā’ al-Rāshīdīn terang dan jelas bahawa di sana zahir dengan seterang-seterangnya bahawa agama Islam tidak dapat dipisahkan sama sekali dengan siasah dan kerana itu salah benar orang-orang menyangka apalagi mengugut-ugut untuk menahan perkembangan Islam itu bercampur dengan siasah. Perbuatan ini ertinya menahan umat Islam daripada menyempurnakan jihadnya pada jalan Tuhan.

Pelajaran di Persekutuan

Tuan al-Sayyid Nasir bin Ismail, Pengarah Dewan Bahasa dan Pustaka, dalam ucapannya menyambut *Mawlid Nabawī Sharīf* di bawah anjuran Kesatuan Pelajar-pelajar Melayu Selangor di antara lain telah menyeru supaya pelajar-pelajar Melayu mengisi dadanya dengan ilmu pelajaran agama Islam yang maha suci.

Walau bagaimana tingginya pun pelajarannya kalau tidak disertai dengan ilmu pelajaran agama Islam yang maha suci maka pelajaran yang tinggi itu tidak akan berguna, kerana ilmu pengetahuan agama Islam adalah pembimbing manusia ke jalan kebahagian dan keselamatan- kata beliau.

Apa yang dikatakan beliau ini sungguhnya benar! Seseorang yang dadanya tidak berisi dengan pelajaran agama Islam maka mudah benar orang-orang itu kelak akan melakukan sesuatu yang kurang baik bahkan mereka akan terjauh dari masyarakatnya sendiri yang umumnya berpelajaran agama.

Kata-kata beliau ini sebenarnya mustahak benar diperhatikan oleh kerajaan Persekutuan Tanah Melayu dan oleh jabatan beliau sendiri. Kalau diperhatikan bahawa di dalam maktab-maktab



Pasukan pengawal penjara (wadar-wadar¹) dengan penuh semangat, sedang berbaris dalam perarakan *Mawlid al-Nabīyy*

yang telah diadakan dengan meriahnya di Kuala Lumpur.

bahasa ataupun di dalam sekolah-sekolah tinggi ataupun di asrama-asrama yang dikelolakan oleh kerajaan, bagi guru-guru yang berlatih ini kurang benar diajarkan pelajaran agama bahkan pada setengah-setengahnya pelajaran agama itu tiada diajarkan langsung. Orang-orang yang belajar di situ sudah tentu tidak akan diharap berpengetahuan agama bahkan mereka kelak menjadi orang yang pada kulitnya sahaja beragama – ertiinya sebahagian daripada mereka kelak bukannya sahaja tidak cenderung kepada agamanya bahkan sesetengahnya jadi orang-orang yang menentang agama.

Kerana itu seruan beliau itu lebih berkesan kiranya beliau mengemukakan hal ini kepada pihak yang berkuasa kerana dengan kedudukan beliau yang kuat pengaruhnya itu tentunya suara beliau akan didengar bahkan boleh dapat dipersesuaikan disebabkan agama rasmi Persekutuan Tanah Melayu itu agama Islam dan pemeluk-pemeluknya mustahak mempelajarinya dan dengan dadanya penuh dengan pelajaran agama sudah tentu mereka menjadi orang yang baik ataupun kalau jadi pegawai akan menjadi pegawai yang baik.

Selain daripada itu perkembangan ini, menurut pendapat kita, sepatutnya dapat pula dikembangkan dengan lebih luas lagi dengan usaha Dewan Bahasa dan Pustaka dengan menggalakkan mengeluarkan buku-buku yang mengenai sejarah-sejarah agama kerana sepanjang yang ada sekarang dewan itu sendiri

boleh jadi belum ada mengeluarkan atau menggalakkan di sekolah-sekolah umum mempelajari ataupun sekurang-kurangnya mengadakan bacaan-bacaan yang cenderung kepada agama seperti buku tawārīkh Islam sebagai bacaan tambahan. Sepanjang yang kita tahu hanya buku-buku yang mengenai sastera ataupun cerita-cerita di Tanah Melayu sahaja yang disiarkan sedang melangkah kepada mempelajari tawarikh-tawarikh Islam umpamanya ataupun pelajaran umum Islam belum dijalankan lagi.

Kita berharap beliau akan memerhatikan hal perkembangan pelajaran agama di dalam penerbitan-penerbitan Dewan Bahasa supaya umat Islam di Persekutuan Tanah Melayu, sekurang-kurangnya mendapat buku-buku agama sebaliknya memenuhi dada dengan pelajaran-pelajaran agama kerana banyak benar di antara orang-orang kita, terutamanya daripada golongan-golongan terpelajarnya sangat sedikit tahu tentang sejarah agamanya. Kerana kekurangan pengetahuan itulah mereka memandang bahawa agama Islam ini jumud keadaannya.

Seterusnya sangat diharap supaya beliau memerhatikan benar hal ini. Kita percaya, sekiranya beliau membuka langkah dalam pekerjaan mengutamakan pelajaran agama (terutamanya mengenai kitab-kitab sejarah agama) umat Islam di Tanah melayu sangat bersyukur kepada beliau dan jasa beliau kelak akan terus dirakamkan dengan dakwat emas dalam sejarah perkembangan agama Islam di Semenanjung Tanah Melayu.

¹ Tidak diketahui perkataan yang dimaksudkan. Tetapi kemungkinan besar merujuk kepada ‘warden-warden’